

[Augsburg], 28./30. Dezember 1554

An Johannes Oporinus

UB Basel, Fr. Gr. I 11, fol. 181r-v.
Steinmann Nr. 675.

S. P. D. Ego verò nudiusquartus demum laetari caepi. adeo tardè chartae Demosthenicae et a Knöringero et a tabellario eodem ferè die mihi sunt redditae. sed redditas tamen esse gaudeo tibiqüe ingentes habeo gratias. Id enim mihi praestitisti vt posthac aequiore animo et victurus et moriturus mihi videar. Atque haec hactenus. Temporis enim breuitas me non sinit μνθολογεῖν. quare maximè necessaria duntaxat, breuiter exponam. ad Functium et Lazium scripsi. Basileam venire non possum. Indicem inchoatum ad te mitto, datus operam, vt reliqua absoluam, modò tabellarij nobis non desint. Iudicium tuum erit. Ego enim imperitus sum Indicifex, vt videbis. praefationem recognitionis, si forte alteram amisisti, denuo ad te mitto, paginam item emendatam remitto. Malim enim omnes alias praefationes perire quam eam quae praefixa est recognito Demostheni, quam anno superiore ad te ipse attuli. In patroni titulo id sequeris quod proximè te monui. Gnomologias et annotationes vnà cum vitis commodiss[ime] primo tomo subiungi posse puto, sed tu tuum sequere iudicium: Mea enim nihil interest. Aeschinem tuum et Demosthenem item tuum, non meum, quanquam meum maluissem propter annotationes marginum et diligentiores meam correctionem, accepi, remissurus ad te cum faenore vbi volueris. etsi mihi videtur Aldina recentiss[ima] editio, quae nescio quam de se opinionem excitauit, eos reliquisse scrupulos, quos Wolfiana industria et diuinatio remouit. διὸ θαρρῶμεν ὡ φιλότης. καὶ γὰρ ἐλληνίζοντες τε καὶ ἔρμηνεύοντες ὑπερνικήσομεν, σὺν θεῷ εἰπεῖν, τοῦς ἀλαζονέστατα ἡμῶν καταφρονοῦντς. 2 libellos abs te missos, nostro Mecaenati reddidi. Ab Huberi tabellario nihil accepi chartarum. Vt autem scias quid in posterum mittere debeas, sic habeto. In primo tomo habeo. a. b. c. d. e. f. g. h. i. k. l. m. n. o. p. q. r. s. cuius extremus numerus est 288. custos. citaret. In secundo tomo. A. B. C. D. E. F. In tertio. Aa duntaxat. cuius numerus extremus 16. custos. non. Has igitur relegam diligenterqüe annotabo errata (quae quidem expectatione mea pauciora sunt) et indicem pro mea sapien<lia> conficiam, quem a te malim supprimi quam impri<mi> nisi tuo iudicio fuerit correctus. Quae interea impresseris, per hunc γραμματοφόρον herilem famulum, aut alium ad me poteris mittere. Ego quantum in me erit operam dabo, ne tibi morae sim, atque elaborabo, vt intelligas sentire me magno me tuo beneficio affectum esse, reuocatis ab inferis meis lucubrationibus. Vale, deqüe Mercurio nostro bene spera. Vendibilius hoc opus erit praeter caetera etiam ob premium minus. ή γὰρ πενία τὴν σοφίαν ἔλαχεν. Iterum vale.

5 Cal[endas] Ianuarias Anno 1554.

Hiero[nymus] Wolfius Tuus.

Wolfgangus meus te orat, vt D. Gregorij sententias spirituales sibi mittas.

Mittes per hunc quicquid poteris. et si recipere volet, duo exemplaria 1 Tomi, ei dabis vt possim vni atque alteri amico offerre. sed in primis integrum mihi efficies hunc tomum quem iam habeo, vt errata in reliquis etiam exemplaribus, quae dominis offerenda erunt, ex eo corrigere possim. Vale. Regem hodie expectamus. 3 Cal[endas] Ianuarias. Literae quas misisti curatae sunt.